

Munye cu Sharon cu apertura precioso di anochi di teatro



E anochi di Premio Nacional di Teatro 2009 bao auspicio di Unesco Aruba y Departamento di Cultura di Aruba tabata tin un apertura precioso cu e obra "Un plegaria y un recuerdo" cu e poeta Munye Oduber -Winklaar y e cantante actriz Sharon Rose Hennep. Tabata trata di un monologo di un biahero (nos idioma Papiamentu) cu Munye recitando e poema Plegaria y Sharon actuando como su "eco", cu gestionnan riba e palabranan y frasenan expresa.

Masha bunita tabata e cancion di Ramon, "Recuerdo" cu a ser canta pa Sharon cu na dado momento tabata sacando e recuerdonan for di baul e baul di recuerdo.

E obra tabata un trabao colectivo di Munye y Sharon Rose. Un obra multidisciplinario di musica, teatro, poesia baile y canto. Den conversacion cu Sharon, el a bisa mi cu el a keda masha contento di a wordo acerca pa e papel den e obra aki y e comentarionan cu el a haya riba su actuacion y e cancion

di Don Ramon cu el a interpreta.

Puntra di con el a desaparece despues di e presentacion y cu Munye a evapora for di escenario, mi a bin haya sa cu mes ora despues di e obra el a bandona Cas di Cultura cu Munye cu mester a sali na careda pa aeropuerto pa no perde vuelo pa Corsow, unda el a presenta na e anochi di entrega di "Tapushi di Oro" cual a wordo gana e aña aki pa e escritora arubiano Desiree Correa.

E presentacion di Munye y Sharon tabata suficiente pa imagina caba cu e anochi lo bira grandi cu locual mester a sigui y nan a logra hinca tur hende den e ambiente festivo cu e obra precioso aki.

E anochi bao direccion di John Freddy Montoya, coordina pa Sra. Ruby Eekmeyer cu su equipo di Departamento di Cultura, a resulta den un exito grandi y bon comenja despues.

Nan tur dos merece un felicitacion gigantesco pa e logro aki.

Juby Naar.